

Nunaannarmi kiisalu illoqarfiit nunaqarfillu killeqarfini assartuutinik motorinik ingerlatilinnik atuineq pillugu ileqqoreqqusaq. (Snescooterinut ileqqoreqqusaq) (Kommuneqarfik Sermersooq)

Assartuutit motorinik ingerlatillit atorineqarneri pillugit Namminersorlutik Oqartussat nalunaarutaat nr 10, 10. oktobari 2013-imeersumi § 6, § 7, imm 2, § 9, imm 1, aamma § 12 naapertorlugit aalajangersarneqarpoq:

Atuuffii

§ 1. Ileqqoreqqusami Kommuneqarfik Sermersuumi illoqarfiit nunaqarfillu killeqarfini kiisalu nunaannarmi assartuutinik motorinik ingerlatillit atorineqarneri pineqarput.

Imm 2. Ileqqoreqqusaq ukunani atorineqassanngilaq:

- 1) Sermersuarmut serminullu sermersuarmiit iigarfusartunut angalanermi.
- 2) Nunaminertamik atuisarneq aamma pilersaarusionerq pillugit Inatsisartut inatsisaat atuuttoq naapertorlugu atuisussaatitaanermik nalunaaruteqartariaqartumik aqqusinerni, unittarfinni narsaatinilu il. il. angallanneq.
- 3) Inuussutissarsiutigalugu nersutaateqarnermik ingerlatsinermut atatillugu angallanneq nalunaarummut matumunnga ilaatinneqanngillat.
- 4) Nakkutilliinermut oqartussaasut avatangiisinik pinngortitamillu nakkutilliinerannut, annaassiniarnernut, politiit paasiniaanerinut, sakkutuut suliaqarnerinut assingusunullu atatillugu angallannerit nalunaarummut matumunnga ilaatinneqanngillat.
- 5) Nakkutilliinermut oqartussaasut avatangiisinik pinngortitamillu nakkutilliinerannut, annaassiniarnernut, politiit paasiniaanerinut, sakkutuut suliaqarnerinut assingusunullu atatillugu angallannerit nalunaarummut matumunnga ilaatinneqanngillat.

Imm 3. Sumiiffinni, angallatit motorinik ingerlatillit atorlugit angallannermut inatsisit allat aqqutigalugit maleruagassiuiffiusuni, maleruagassiat sukkulluunniit killilersuiffiunerusut atuutissapput.

Nassuiaatit

§ 2. Illoqarfinnut nunaqarfinnullu tunngatillugu nalunaarummi matumani pineqarput, nunaminertat kommunip pilersaarutai atuuttut malillugit illoqarfinni nunaqarfinnilu anguniakkanut attuumassuteqartut.

- 2) Nunaannarmi: Nunaannaat nalunaarummi matumani tassaatinneqarput nunaminertat, illoqarfiit nunaqarfiillu avataaniittut, kangerluit imartallu sikuunermik nalaani nunaannarmiittutut naatsorsuunneqassapput.
- 3) Angallatit motorinik ingerlatillit: Qamutit larvefodinik assakaasunilluunniit ingerlatillit, sikukkut, aputikkut, qaqqatigut pinngortitamilu nunami allatut ilusilimmi angallatitut ilusiligaasut atorineqartulluunniit.
- 4) Imeqarfimmut killeqarfik: Imeqarfimmit imermik pilersuiffiusumut immikkoortoq. Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersoq naapertorlugu imeqarfimmut killeqarfik illersugaavoq.

Nunaannarmi motorinik ingerlatilinnik atuineq

§ 3. Nunaannami motorinik ingerlatilinnik atuineq kisimi pisinnaavoq ukiukkut ingerlaffissatut killiliussani aammalu ukiukkut assartuussinermut atatillugu ingerlaffissani kommunalbestyrelsip akuerisaanni, ilanngusaaq 1-5 innersuussutigalugu.

Nunaannarmi motorinik ingerlatilinnik atuineri ataatsimoortumik aalajangersakkat

§ 4. Angallanneq pisinnaavoq taamaallaat nunap qaava pukkinerpaamik apummik 10 cm manngersumik imaluunniit 20 cm aqitsumik qallerneqarsimappat, qalleqqanerani naasut nunallu qaava ajortisarneqarsinnaanani, taamaattoq imm 2 innersuussutigineqarpoq.

Imm 2. Imm 1-imi aalajangersakkat naapertorlugit imaani, tatsini kuunnilu sikukkut ingerlaneq pissanngilaq.

Imm 3. Nunaannarmi angalanermi naasunut aseruutaasinnaasumik sangupiloorfigineqassanngilaq, aallarsarfigineqassanngilaq unipiloorfigineqassananiluunniit.

Imm 4. Kuuit sinaat uingarnillu kiisalu tatsit killingi, kuuit annerit kiisalu kangerluit ikaarneqartassapput, naasut nunallu ajoquserneqarfissarinngisaasigut.

Imm 5. Angallannerni tamani uumasut eqqarsaatigineqassapput aamma tutut, umimmaat savallu ataatsimoortut aamma nannut minnerpaamik 500 meterisut ungasitsigisumiitsillugit ingerlaartoqartassaaq.

Imm 6. Qamutit motorillit nunaannarmi aserortoorpata nunap naasullu uulianik orsusanillu kuuttoqarnerani ajoquserneqannginneranni piaarnerpaamik peerneqassapput. Qamutit motorillit kommunalbestyrelsimit uparuarneqareersut peerneqanngippata qamutit motorillit piginnittumut akiligassanngorlugit namminerlu akisussaaffigisaanik kommunimit peerneqarsinnaapput.

Illoqarfinni nunaqarfinnilu motorinik ingerlatilinnik atuineri ataatsimoortumik aalajangersakkat

§ 5. Majuartaateqarfinni, sisoraatinik ujakkaartarfinni, golfertarfinni, iliveqarfinni, mittarfinni, timersorfiusartuni arsaaffiusartunilu angallanneq inerteqqutaavoq.

Imm 2. Illoqarfinni nunaqarfinnilu assartuutinik motorinik ingerlatillit aalajangersimasut immikkut ingerlasarfissaat kommunalbestyrelsimit akuersissutigineqarput, assartuutillu motorinik ingerlatsillit pineqartut atorlugit immikkut aqutigeqqusaasutigut ingerlasassapput.

Imm 3. Qamuteralannik angallassineq piffissami nal. 23:00 aamma nal 06:00 akornanni inerteqqutaavoq, taamaakkaluartoq Ittoqqortoormiini piffissamik killilersuisoqanngilaq.

Immikkut ittumik akuersissutit

§ 6. Pisuni immikkut ittuni atugassiissutigineqartut avataani assartuutit motoorinik ingerlatillit atorlugit ukiukkut angallannermut killeqarfiit aammalu ukiukkut assartuinnermut aqutissatut akuerisani angalanissamut kommunalbestyrelse immikkut ittumik akuersissuteqarsinnaavoq, § 3 naapertorlugu.

Imm 2 Immikkut ittumik akuersissuteqartoqarnissaanut qinnuteqaat tunngavilersugaq angalanissaq pilersaarutaasoq kingusinnerpaamik sapaatit akunnerinik sisamanik sioqqullugu kommunalbestyrelsimit tiguneqarsimassaaq, aammalu nunaminertat imaluunniit aqutissat nalunaarsorneqarnerinik imaqaassalluni. Qinnuteqaammut ilaatinneqassapput nunaminertaq atugassaq- imaluunniit angallavissap nalunaaqutsernera kiisalu angallassinissamut siunertarineqartoq.

Imm 3 Kommunalbestyrelse immikkut ittumik akuersissuteqarnermut atatillugu naapertuuttutut isigineqarsinnaasunik piumasaqaateqarsinnaavoq.

Imm 4 Imm 1 naapertorlugu akuersissutit sukkulluunniit kommunalbestyrelsimit imaluunniit Naalakkersuisunit allanngortinneqarsinnaapput utertinneqarsinnaallutilluunniit, immikkut ittumik akuersissuteqarnissamut piumasaqaatit unioqqutinneqarpata, imaluunniit kommunalbestyrelsip Naalakkersuisulluunniit naliliinerat malillugu pissutsit pingortitamut avatangiisinullu ajoqusiisinaasut pineqarpata.

Imm 5 Immikkut ittumik akuersissutit ukioq ataaseq tikillugu tunniunneqartarsinnaapput.

Nakkutilliineq il.il.

§ 7. Kommunalbestyrelsip nalunaarummi uani malittarisassat malinneqarnerisut nakkutigissavaa.

Imm 2. § 4-mi angalanermut maleruaqqusat piffissap ilaani naammassineqarsimanngippata kommunalbestyrelse inerteqquteqarsinnaavoq peqqussuteqarsinnaallunilu.

Imm 3. Peqqussutit tassaasinnaapput angallaviit aalajangersimasut atorneqarnissaannik piumasaqaatit.

Imm 4. Inerteqqutit tassaasinnaapput sumiiffinni aalajangersimasuni piffissami aalajangersimasumi angallannerup tamarmi unitsinneqarnissaanik piumasaqaatit.

§ 8. Nalunaarut manna naapertorlugu aalajangikkat tamarmik Avatangiisit innarlitsaaliorneqarnissaat pillugu Inatsisartut peqqussutaanni nr. 9-mi, 22. november 2011-meersumi kapitali 14-mi malittarisassat naapertorlugit naammagittaalliutigineqarsinnaapput.

Suliakkiissutit

§ 9. §3-mi imm. 1-imik aamma 2-mik, § 4 imm 1-imik aamma 5-imik aamma § 5-imik, imm 1-3-mik unioqqutitsineq akiliisitsinermik aamma/imaluunniit arsaarinninnermik kinguneqarsinnaapput.

Imm 2. Piumasaqaatinik, § 6, imm 3 naapertorlugu aalajangersarneqartunik unioqqutitsineq akiliisitsinermik kinguneqarsinnaavoq.

Imm 3. § 7, imm. 2-4 naapertorlugit peqqussummik imaluunniit inerteqqummik unioqqutitsineq

akiliisitsinermik kinguneqarsinnaavoq.

Imm 4. Ingerlatseqatigiiffit il.il (inatsisitigut pisinnaatitaasut pisussaatitaasullu) pinerluttulerinermi inatsisitigut akisussaatinneqarsinnaapput, Kalaallit Nunaanni pinerluttulerinermi inatsimmi kapitali 5-imi aalajangersakkat malillugit.

Imm 5. Imm 1-4 naapertorlugu akiliisitsissutit Nunap Karsianut nakkartinneqartassapput.

Atuutilerfissaq

§ 10. Ilegqoreqqusaq una atuutilissaaq ulloq 10.03.2020

Kommuneqarfik Sermersuumi Kommunalbestyrelsimi akuersissutigineqarput ulloq 13.03.2020

Charlotte Ludvigsen
Borgmesteri

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut